

四庫全書

集部

欽定四庫全書

宋元詩會卷七十五

兵部主事陳焯編

馬祖常

字伯庸世為永古特部居靖州天山其高祖實喇濟
蘇于金季任鳳翔兵馬判官子孫俱以馬為氏曾
祖烏呼訥從世祖征宋留汴轉餉遂家于光州祖
常七歲知學得錢即以市書既長從蜀儒張璪受
業璪甚器之延祐初鄉貢會試皆中第一廷試第
二授應奉翰林文字字拜監察御史直聲震一時會
特們德爾專政祖常率同列劾其十罪仁宗默之
姦臣復相左遷開平縣尹將欲中傷之遂退居光

州姦臣死除翰林待制擢典寶少監太子左贊善
尋兼翰林直學士陞禮部尚書丁祖母憂起仍原
官天厯初兩知貢舉一為讀卷官號稱得人厯參
議中書省江南行臺中丞同知徽政院事遂拜御
史中丞樞密副使辭職歸光州自是屢詔皆不起
至元四年卒年六十追封魏郡公謚文貞祖常工
文章尤致力于詩圓密清麗大篇
短章無不可誦可傳有集行世

古詩

凌晨視園蔬綠色承露英命婦自採摘終朝掬不盈持
以充庖厨豈療饑腸鳴婆婆秋菰葉不受魚肉腥朝暾
煦寒畦中心含素馨

舟中望鄒嶧山

魯雲偃車蓋汶水流魚鱗
操舟返任濟川梁號通津東
望鄒嶧山六丁鑿嶙峋
靈巖溜泉乳仙遊道霞輶石髓
如可食吾將託茲身

齋宿太社署

朱門屹南起金水經北流
繚垣外旁達周屋內廣脩圭
玉承璫藉碧鏤飾衣篝中壇土五色夏松露浮浮改容
事明神豈謂茲淹留

齊宮蔚清華前榮寫方壺右礎石芙蓉日景射銅鋪嘉
木蔭長夏階草宜露濡兵衛限囂雜簷網縣蜘蛛署書
督染盛設吏視茅苴端居見博士希武循庭除

度居庸關次繼學韻

飛鞚陟雲巘決背盡圖畫天氣吹高寒山雨灑長夏冥
冥白鳥去寂寂松子下陸行石當頭水春泉繞舍高與
蜀道齊深乃盤谷亞筍輿約重來羸馬苦常跨朋從詠
連疊酬應給閒暇得見王子喬吾將驂鶴駕

西方樂

魯郊秋已深西樂多蒲魚日暮積靄重維舟月生初露
涼水禽宿雨晴艷芙蕖擷花結楚佩宛若湘南居

苦寒 二首

肅肅歲已晏冽冽冰霰集寒雲光不流槁木鳴日夕挾
續處南戶嚴稜坐相襲端然成離居念念穉陽復
褰裳居重戶驚飈沓書帷穴地篝石火持酒得冰澌
杲日出光萬物待彼施豈無陽和節歲序非爾私

淵明東籬圖

畫史謝文字託意在粉繪高人蹈古道終造玄澹會涉
世情豈真採菊心若寄持酒每自慰悠悠似相契

擬古

崇臺拂繁雲阿閣蔭廣路上有彈琴女文采被煙霧玉
食薦翠盤渴飲瑤草露鄙薄貧士妻終歲弄機杼

送衛大隱卜者

飲馬盧溝河水寒傷馬骨牧羊居庸關草短餓羊腹君

行苦怱怱我且無握粟陟岡望高雲東南有黃鵠

初日

初日照我樹我樹日華滋檀欒綠陰合四顧無曲枝盛
暑熾煩歎其中有涼颼成林蔭千畝棲息任所宜

種桃

種桃南山麓三歲不得實種瓜東郊園擷之在百日豈
不思遲暮終焉有常食如何植瑤草千歲始一獲

端午效六朝體

脩篁發秀林新荷疊芳池
絲絲擷霧縷紗縠含風漪
蕤賓應樂律端陽正歲時
馥馥蘭湯浴艷艷蒲酒持
漢宮鬪草戲楚船張水嬉
江心鑄龍鏡好用照湘纍

留別沂州張君仲

揚舲下彭城分颿上沂水
與子作別離眷言重徙倚
曩在京華居連室同井里
出則鑣御聯入則衣袂比
茲晨各散去相顧意未已
我操田器歸子執州符
仕慎勿輕此身期以善自止

移梅

幽屏逐魚鳥沈跡儔隱淪所欣在林藪嘉植日以親眷
言江介品紛葩號南珍遇我好竒服移根得良因井井
十畝園菁茅蔭澗濱縞裳被玉質宜此空山春

田間

中田蒔柔桑周垣列菀柳居然成農耕林廬頗完厚朋
從時往來牀頭出樽酒意氣每酣適仰視北有斗豈知
念湘纍那復嘆魯叟丈夫貴立志文字託永久

古意

秋羅畫雙蝶涼颿透鮫綃攀紆翠襪積騰拏鳳盤翹公
子高宴集水閣芙蓉搖來禽丹砂紅石蜜春冰消歡情
光景洽壯意風雲飄所期國士知豈謂虞人招

上京書懷

燕子泥融蘭葉短疊疊荷錢水初滿人家時節近端陽
繡袂羅衫雙佩光共笑江南五雜組畫鷁浮波供角黍
沙苑射柳追風駒古來此地為名區

所過

寧王玉笛吹鳳凰
桐花秋露宮晝長
開元天子忽思武
手中金箭照眼光
何物羣婢出後房
羽林孤兒射殺將
坐中凜凜無漁陽

李夫人

未央天子香醺骨
夫人不貯黃金屋
水銅無光澀秋月
留得當年舊蛾綠
瑤臺夜佩聲闌珊
沈雲叫雁沙泉寒
二十五絃彈鳳凰
玉釵小燕飛春山

題織錦回文圖

桃葉渡江不用楫
織女烏鵲填河白
合歡樹下宜男草
色色不及羅裙好
織錦度曲聲亦柔
黃龍塞是契丹州
夫君戍歸定何日
樂府陳娘歌第一

秋意

張良廟前流水聲
歌風臺下曉雞鳴
行人舟中寐復起
此生亦欲成功名
白髮可憐升斗祿
持歸不足求田屋
揮杯看劍獨長嘯
萬里朝雲見晴旭

湖北驛中偶成

江田稻花露始零
浦中蓮子青
復青楚船祠龍來買酒
十幅蒲帆上洞庭
羅衣熏香錢滿篋
身是揚州敗鹽客
明年載米入長安
妻封縣君身有官

李後主圖

澤國中寒歲年晏
沙嶼潮痕明
石棧風吹半樹野梅發
天上書來問春雁
江南後主丹鉛手
畫盡冰絲世無有
宮中長畫諫囊稀
嫵媚吳娃雙進酒

送周南翁之官池陽

霏微桂叢綠霧深集仙書殿秋沈沈
九華山影墮酒酸
便欲起挹青楓林青楓林高霜葉赤
遙遙連雲雁行急
蜀麻吳鹽來往時閒坐城樓聽江笛

題明皇端箭圖

銀牀墮露下高桐竹練含冰留麝籠
蒲萄酒作礪礪紅
湘娥江邊採芙蓉月華流影天漢東
素商淒清颺微風
草根知秋有鳴蛩

過文著作家

誰住街西屋文昌著作臣茶甌宜客靜書帙覺予親栽
竹應棲鳳操觚定獲麟青藜明夜半北極動星辰

送王睂叟真人

秋暉上寒竹白鶴立蒼苔石洞松花落雲房澗水來彈
琴翻道曲搗藥應猿哀別浦迴船急孤山看早梅

送人之陝省幕和韻

綬帶驚沙鶴紗巾逐海鷗驪山泉未冷華岳樹先秋路

出汾陽里衣仍晏子裘風流蓮幕美君豈歎淹留

送蘇子寧赴嶺北省幕

雞塞鳴啾晰龍沙列夜營賜衣俱魯縞給餉盡吳杭野
井冰生夏寒天雪沒晴藩垣資贊畫幕府正知名

謁告書懷

先子桐鄉地年來憶舊遊山春花競發沙旭水閒流石
屋青霞夜藤牀碧樹秋防身龍具在強欲問吳鉤

泗州塔

梵塔層層出雲間見象輪金光動淮水鐸語名川神負
載坤多力莊嚴佛有因埏陶千萬億窈石刻銘新

舟中

叢薄縈雲曲岡巒引霧靈舟輕風燕疾衣薄水螢侵夜
久江喧瀨秋清竹滿林閒情任飄泊到處欲登臨

海子橋二首

朝馬秋塵急天潢晚鏡舒影圓雲度鳥波靜藻依魚石
棧通星漢銀河落水渠無人洗寒露為我媚芙蓉

南望蓬萊觀行人隔苑牆有時馴象浴不見狎鷗翔宮
樹飄秋葉江船認石梁辟雍真可作擬賦獻文王

送符鎮撫之官

金符傳拜將白羽看麾軍吹角弓橫月開旗馬望雲鬣
家書盡讀新府令初聞油幕風流盛吾歸詫隱君

贈里人別因寄祖義祖烈

萬里天南地逢君似到鄉欲同觀海嶼忽別上河梁楚
樹思題葉淮僧憶借航歸時報兄弟莫遣石田荒

再從浙入閩 二首

江外淹留久那堪去復回水生客星瀨日出偃王臺
竈茶甌至筠籠橘顆來春雲又成雨著意落寒梅
積雨關河溼今朝日始晴浮船下夜瀨覓酒近春城
鷺鳴將雛出牛羊傍母行獨憐無似客萬里又南征

遊華嚴寺

化國日遲遲招提獨往時鶴馴看梵磬猫定護齋糜
貝葉翻經譯沙牆應制詩庭前雙樹好長夏得風吹

出都

長城懷古處身在日華東
水出盧龍塞山連碣石宮
沙鷗終自白霜樹忽然紅
雲海鴻濛氣歸颿杳靄中

贈楊洞天道人

我自不入俗君今又欲仙
鳥啼百花裏屋住萬山邊
密樹雲難過空潭月易圓
題詩秋卷了為說小行年

次韻咏石

老石何年有依稀滿路旁
無人愁飲羽有客坐亡羊
戒

世能言晉傳書豈姓黃補天成五色何獨柱明堂

用樂天韻因效其題詠閒意

縹絲車響雨來稀
卷畫圖中住翠微
村北村南桑扈叫
家前家後竹雞飛
青憐藤蔓春牽屋
綠愛荷盤夏剪衣
更憶江天家萬里
行逢僧子借船歸

壽郝大參

退傅歸來髮尚青
角巾閒對老人星
鳳凰池上辭松閣
鸚鵡洲邊買竹亭
留客只談三里霧
見人寧問五侯鯖

慚無剛卯為公壽他日淮南種茯苓

九日在告

青山到屋三十里瘦馬不能閒一過欲趁重陽浮菊蕊
翻愁落葉下巖阿南鴻帶雨秋飛急北谷來霜夜杵多
病裏題詩遣野興何人攜手與高歌

題若谷

擊劍酣歌白日迷高情邈邈見天倪石潭藻舞魚深泳
花嶼春明鳥自啼架上道書研宇宙篋中衣帶剪虹霓

洞房清晝奩香轉坐聽東街馬過泥

錢塘潮

石橋西畔竹棚斜閒日浮舟閱歲華金鑿縣崖開佛國
玉分飛瀑過人家風杉鶴下春鳴埵雨樹猿啼暝蹋花
欲賃茭田來此住東南更望赤城霞

蓋善長御史泗濱堂

泗水千年碧似藍泗濱華屋締榱桷人從魯北耕春雨
山自徂徠供夕嵐方印只今垂組紐長繁猶獨近書龕

天邊倦客滄洲遠卷裏題詩興未堪

治書再和復次韻

西南春巷杏花牆索米長安漢戟郎市裏忽聞雞吐綬
海邊還報鳥含香月移桂樹通階石芝發銅池謝井牀
襍直閣門休沐晚新詩刻燭賦千章

鄆陵別南客

層層林表白浮圖古鄆城高旅望孤秋雨喜沾梁土麥
暝烟愁合楚田蕪行人北上隨沙雁歸客南還對渚鳬

溱洧波清饒草樹百年生聚尚繩樞

寄弘長老雲山

曙雨初生蟬竦檣梵山吟唄不移朝曾分禪榻春盤礪
更想雲山夜寂寥繭紙題詩尋伴少耶筒沽酒入城遙
佛龕千丈金銀界照世酥燈弟子燒

送安慶路教王中夫

南國煙花一萬重船浮春水正溶溶舒州城壯山偏護
博士官清印自封夜誦挑燈吟蟋蟀秋行攜酒采芙蓉

仙人李白今應在問訊時時過宿松

送蘇州卜者

幾歲京華賃屋居得官猶苦食無魚
成都誰問君平卜江左人知郭璞書
春水浮空波緩緩秋機織字錦舒舒
虎丘刺飲千鍾酒醉裏高歌唱闔閭

奉陪薦食英宗神御殿用繼學韻

乘石松陰偃翠虬先皇曾此駐龍輶
茂陵弓劍隨天御原廟衣冠奉月遊
藉玉已行周制度酌金那罰漢諸侯

百磬水陸修醮望拜孤臣涕莫收

送王參政上京奏選二首

滇池細馬踏龍沙宰相朝天路不賒
峽裏琴泉春作乳月中珠樹夜成花
三千禮樂尊儒術百二山河壯帝家
魚上禹門無點額直郎宣奏日當衙

千官吉日聽宣麻白髮文臣帝汝嘉
池鳳有毛皆五色藥珠無樹不三花
綠綈詔底書分雨紅錦囊中字剪霞
天路北盤三十六歸時秋月滿京華

送胡震亨巡簡

獵獵雙弓騎氣張
古來逢掖試穿楊
清江鑄鏡芙蓉月
綠酒筵開玳瑁堂
稻熟萬塍初下水
橘垂千樹已經霜
藍袍包裹迎丞簿
莫負尚書薦鶚章

送毛真人還山

朱提仙印碧霞裳
賜履承恩自尚方
雨灑石壇苔錦滑
日穿油幌竹書光
葉鳧此日還滄海
漢鵠當年下建章
琪樹萬叢芝萬本
江南歸路水雲鄉

雜詠二首

百丈牽船沂上流，清淮從古有三洲。
浮山堰遂降王去，淝水波因小謝收。
紅樹有霜還可騎，白蘋無雨更宜舟。
平生自是多行役，莫信吾家馬少游。

濠梁無客更觀魚，遊子行過莫問書。
潮落沙痕鷗泛少，風回雲影雁行疎。
歸帆夜宿山前寺，從橐秋辭仗外車。
俯仰此身天地內，滄洲重去帶經鋤。

西山

鳳城西去玉泉頭楊柳堤長馬上遊六月熏風吹別殿
半天飛雨灑重樓山浮樹蓋連雲動露滴荷盤並水流
艤岼龍舟能北望翠華來日正清秋

石城縣尉

石城縣尉坐寒廳日有新詩寫後屏官小不騎沙苑馬
書多空識楚江萍老兵束矢除階草佐吏休衙罷閣鈴
兄弟幾年為我友何時同舍究殘經

無題

三湘瀟灑恨無潮
烏鵲填河願有橋
丹穴鳳來龍樹遠
海門魚去蜃樓遙
已知京兆誇高髻
不信章華鬪細腰
船尾橫江春水急
長年無事恨吹簫

次韻李行齋集賢

英聲籍甚著天門
詩句年來與我論
沙磧翳雲歌北塞
稻畦分水夢東屯
秋風八月推茅屋
夜雨三更注酒盆
明日桑乾須繫馬
翠華過處看承恩

寄姚叅政上都

南熏清暑上京居六月涼亭正打魚雨嶺火明山芍藥
風田金動草芙蓉甘泉曉仗臨前殿京兆秋塵待屬車
侍從文臣行不送舊寮淹蹇意何如

寄贈揚州王鍊師

仙客吹笙踏月輪因遊淮海誤尋真松花擣月分貧士
柿葉題詩寄遠人清水有潮留載酒春雲不雨取裁巾
江都千樹隋宮柳曾見先生綠髮新

挽何得之先生

手織烏紗日賣錢全家移住五雲邊
伏生有女書空在伯道無兒世共憐
北市行歌花爛漫西亭坐歎月嬋娟
少微光氣今年暗知是詩隨過海船

開平事

金馬東門畫省西千官花覆曙光低
九莖芝蓋雲衣合百石銅盤露顆齊
鹿柵已營脩竹塢燕巢還補落花泥
上林伏日金桃熟鸚鵡來時不敢棲

還過龍門

紫塞秋高鳳輦回龍門有客去還來
蕩摩日月崑崙坼吐納風雲混沌開
天帝有神司主宰地靈無力載崔嵬
誰吹石瀨成飛雨不使時人污酒杯

光山縣孔宰幽風亭

光山近在故山西樹滿岡頭稻滿畦
鄰屋讀書相教授社祠酣酒共提攜
水牛礪角嫌耕淺野繭抽絲喜價低
春雨行田無從吏獨騎羸馬畏青泥

次韻進士宋顯夫海岸春行

靈沼春波殿影高
行人苑外望蟠桃
街塵曙雨沈紅霧
宮瓦晴飛動翠濤
鳥度鏡中還避彈
魚跳船尾不因篙
曲江別有新承宴
笑我官曹似馬曹

菊枕

東籬采采數枝霜
包裹西風入夢涼
半夜歸心三徑遠
一囊秋色四屏香
牀頭未覺黃金盡
鏡底難教白髮長
幾度醉來消不得
臥收清氣入詩腸

登雨花臺

積翠生層巘凝光浴巨濤吳城花覆井楚舸竹栽篙地
近魚龍逼天空鶴鶴高野橋皆蟠螭溪水盡蒲萄雨石
逢芝箭風林得鳳毛臙脂兒女小罨畫鬼神饗六代都
銜壁三山尚戴龍故宮猶在苒古樹漫周遭仙洞歌瑤
草人家宴碧桃飯香非接淅酒好不筭糟綠霧春連閣
丹霞曉映袍攀躋歡境勝跋涉憚人勞老我才還劣清
資愧重叨采詩今有使問俗似無曹佳麗千年最聲名
一世豪歲時休澣日攜手足遊遨

求趙伯顯畫家山圖用唐李中韻

春雁南來後家書一紙無山花應向日陂水計通湖
羸特衣資絮生蠶薄藉蘆久宜拂白石強此伏青蒲琴客
分抄譜仙翁許借壺園紅榴火煉沼綠芡盤鋪嵐氣飄
簷隙煙光鬱座隅呼雲橫蟬竦問月看蟾蜍倚杖心何
逸觀魚興不孤新開竹林逕併乞寫成圖

猗綠園

殖產吾何取開林我獨能縛船嘗取竹擣紙每移藤池

曲波濤小花繁霧雨蒸春雲同礎潤秋月共江澄鳳下
非因食魚來不可曾寫經還道士裹飯乞行僧筍屨新
青折荷衣舊翠凝浮甌茶有乳溢甕酒無冰香地留文
篆書囊剩繚綾清晨餐玉罷東坐日初升

泉南孫氏園亭

鑿石通歸汐浮梁看浴暎鴨開萍上麈鹿柵蘚生垣蒼
藟乘梔子簣當長竹孫書香芸辟蠹席煖錦裁鴟交客
登仙籍承家荷帝恩冰甌蜂蜜溜酒榼荔漿翻吹簫花

圍屋彈琴鶴舞園海雲春有態閨雪夜無痕誰謂衣裳
懶予今杖屨煩捋鬚歌月地翹首望天門

楊妃墓

漢廟衣冠照碧燐唐陵翁仲作黃塵馬嵬坡上棠梨樹
猶占秦原幾日春

驪山

玉女泉邊翠藻多石池涵影媚宮城可憐繡嶺啼春鳥
猶似梨園弟子歌

送胡古愚還越

越江秋水得霜清
夜夜天南婺女明
客子布衣風又急
世間無用是才名

閩浙之交

路入閩中盡翠微
家家蕉葛作秋衣
石牆遮竹松圍屋
時有丹禽哺子歸

趙氏宗室畫水石

生平已識趙王孫
竹素何年畫石根
萬里南雲秋似水

直容艇子到柴門

和史參政韻

五雲天近晝香殘
紅白花枝滿樂欄
一夜東風吹小雨
殿頭持卷隔簾看

流鶯

喬木繁陰晝景舒
檀桑綠色滿階除
京都三月花飛盡
纔聽流鶯一囀初

蔡琰圖

邊月還如漢月圓
龍堆沙水咽哀絃
文姬此夕穹廬夢
應到春閨舊鏡前

代悼亡為陳云嶠作

燕子樓空花不開
繡簾天晚月初來
手痕留在紅牙板
猶有餘香妬落梅

王士熙

字繼學東平人任浙東肅政廉訪司歷官中丞
其父構官翰林承旨贈大司徒魯國公謚文肅

玉環引送伯庸北上

崑山有美璞，昆吾有寶刀。堆雪漉寒水，凝此英瓊瑤。團
團月長滿，晶晶白雲淺。似環環無窮，寥寥人意遠。有美
天山人，皎潔同精神。禁垣青春多大佩，垂朝紳腰無大
羽箭。肘有如斗印，結束上京行。騶駒驟長勒，不采珊瑚
鈎。海深安可求，不執水蒼璧。朔廷羅公侯，愛此玲瓏質。
題詩贈與客，百金一朝傾。三年不可得，不得只空行。山
泉琴峽鳴，摩挲龍門石。憶憶應留情，天風北極高。歸途
踏霜草，不惜玉環分。只願君歸早。

早朝行

石城啼鳥翻曙光千門萬戶開未央丞相珂馬沙堤長
奏章催喚東曹郎燕山驛騎朝來到雨澤十分九州報
輦金馱帛分遠行龍沙士飽無鼓聲閣中龍牀琢白玉
瑟瑟圍屏海波綠曲欄四月櫻桃紅舜琴日日彈熏風
送蘇公赴嶺北行省郎中

居庸關頭亂山積李陵臺西白沙磧畫省郎官貂帽側
飛雪皚皚馬韉濕馬蹄雪深遲遲行冷月悽雲塞垣明

鐵甲無光烽不驚萬營角聲如水平
明年四月新草生
征人賣劍隴頭耕思君遙遙隔高城
南風城樓來雁鳴

玩芳亭

何處春來好城南尺五天地幽
迷曉樹花重壓春煙上
客拋羅袂佳人舞畫筵
晚來清興熟移坐曲池邊

題鮮于伯機與仇廉訪帖

三生文采趙公子四海聲名仇使君
彈琴不作廣陵散
焚香遙駐博山雲
玉署春來鶯漫語繡衣人去雁空聞

龍蛇兩紙光如玉即是安西與右軍

其帖曰魏公子明
日外過寒舍應訪

能一來焚香彈琴亦
甚佳公子子昂也

送巨德新

渭城秋水汎紅蓮白雪梁園作賦年金馬朝回門似水
碧雞人去路如天揚雄宅古平蕪雨諸葛祠空老樹煙
小隊出遊春色裏滿溪花朵正娟娟

壽劉邢公

詔下金鑾第一廳春風湛露譙趨庭嘉辰又緩蒼龍角

仙侶同驂白鶴翎
衛武高年猶入相
韋賢老日只傳經
崆峒別有長生訣
杖几凝香酒半醒

送袁道士二首

五公舊譜漢庭傳
之子飄飄去學仙
山裏牧羊成白石
臺間騎鶴上青天
黃庭夜月吟三疊
綠綺秋風度七絃
拂袖京塵留不住
別離可奈落花前

軒轅雲裔越公家
學道青山幾歲華
仙覓安期曾授棗
詩成湘子解開花
金砂擬煉長生藥
銀海初回遠使槎

二十四巖明月夜簫聲何處落烟霞

寄上都僚友

天上風清暑盡消尚方仙隊按雲韶
白鵝海水生鷹獵紅藥山岡詐馬朝
涼入賜衣飄細葛醉題歌扇溼輕綃
河堤楊柳休傷別八月星槎到鵲橋

題節婦

寒窗機杼泣秋風鏡影鉛雲不汝同
明月有光生夜白貞松無夢妬春紅
羅襦舊繡天吳折綠綺離弦海鶴空

陌上行人指華表
閑門疎雨落梧桐

驪山宮圖

翠嶺餘煙曉仗催
五家車騎入朝來
千峰雲散歌樓合
十月霜晴浴殿開
烽火高堂留草樹
荔枝長路認塵埃
月中人去青山在
始信昆明有劫灰

送袁德平歸越

平湖如鏡靜秋波
禹穴西風捲綠蘿
狂客有船都載酒
道人無字不籠鵝
牀頭書笏青雲近
窗下殘編白雪多

燕市塵深拂衣去海門何處問漁蓑

寄武夷思學齋

武夷山色清於水君築高齋第幾峰北苑鶯啼春煮茗
西風鶴語夜巢松田家送酒芝香瀉道士留書石髓封
聞說牙籤三萬軸欲憑南雁約相從

送朱真一住西山

官河新柳雪初融仙客歸舟背楚鴻鐵柱畫閒山似玉
石樓人靜水如空煮茶榻畔延徐孺采藥爐邊覓葛洪

天上雲多白鶴去子規何事怨東風

上京次馬伯庸韻

侍臣催講御階西雲靜觚稜曉色低天闢神州卑兩漢
地連碣石轉三齊含香畫永閒青瑣視草堂幽溼紫泥
最憶東山老松樹秋風應有鶴來棲

王在中代祀秦蜀山川

太華雲連蜀棧低柳花三月紫騮嘶香浮曉露金匱溼
旂拂春煙絳節齊策牘當年登桂苑詞林後夜趨芝泥

長安遊客應無數誰共王褒頌碧雞

和馬伯庸寄袁學士

白雪賡歌少朱絃詠歎長天池鷗獨運霧谷豹深藏舊
地收華戟新田買石房閒情齊綺皓時論佇班揚瑚璉
登周廟宗彝畫舜裳西昆分顥氣南斗避寒芒六月灤
陽扇三秋鏡水航彈琴無俗曲辟穀有仙方玉海羞麟
脯金莖饋露漿書空忘咄咄文障拂堂堂翰府聯芳遠
樞庭奕葉光名山留史策烏國售詩章節擬芝田鶴音

諧律管凰寫經酬道士立塔禮空王藉草連裙碧分觥
注酒黃竹牀吟几小紗幘鬢絲涼離別三生夢歸依一
瓣香升堂乘笑語在野愧才良雲擁鄞山雨潮生定海
洋何時宣室召四馬驟康莊

李宮人琵琶引 三首

瓊花春鳥百花香太液池邊夜色涼一曲六么天上譜
君王為進紫霞觴

鑾輿三月幸龍岡宣喚新詩促曉妝撥斷冰絃秋滿眼

塞天雲碧草茫茫

一入深宮歲月長
承恩曾得侍昭陽
檀槽按出新翻曲
五色雲中落鳳凰

宋本

字誠夫大都人幼從父禎官江陵聞王奎文明性
理之學本往質所得造詣日深善為古文詞名播
荆楚年四十始還燕至治元年廷試第一人及第
授翰林修撰泰定元年春除監察御史糾劾權要
無少鯁避于地震直陳時事致災詞氣奮激衆皆
聳聽移兵部員外郎轉中書左司都事遷禮部郎
中陞吏部侍郎改禮部文宗開奎章閣擢為學士
進禮部尚書卒年五十四所著有至治集四十卷

行子
世

大都雜詩 四首

拋却漁竿滄海邊
拂衣來看九重天
畫欄九陌橋如月
綠影千門樹似煙
南國佳人王幼玉
中朝才子杜樊川
紫雲樓上如澠酒
孤負春風二十年

繡錯繁華徧九衢
上林詞賦漢西都
朱門細婢金條脫
紫禁材官玉鹿盧
萬里星辰開上界
四朝冠蓋翊皇圖
東鄰白面生紈綺
笑殺揚雄臥一區

盧溝曉月墮蒼煙十一門開日色鮮
海上神山無弱水人間平地有鈞天
寶幢珠珞瞿曇寺豪竹哀絲璫瑁筵
春雨如膏三萬里盡將嵩呼祝堯年

形勢全燕擁地靈梯航萬國走王城
狗屠已仕明天子牛相寧知別太平
玄武鈎陳騰王氣白麟赤雁入新聲
近來朝報多如雨不見河南名賈生

船上謠

送伯庸以番貨事
奉使閩浙十首

江華江月要才情多病堪憐馬長卿
莫向都門折楊柳

帝鄉春色不南行

琉球真蠟接閨婆日本辰韓滅貊倭番舶去時遺碇石
年年到處海無波

朱張死去十年過海寇凋零海賈多南風六月到岼酒
花鼓篙丁奈樂何

湧金門外是西湖隄上垂楊盡姓蘇作得吳趨阿誰唱
小卿墳上露蘭枯

舊時家近黑橋街三十餘年不往來憑仗使君一問訊

楊梅銀杏幾回開

閩中父老白髭鬚老子風流記得無昔日郎君騎竹馬

如今使者駕輶車

伯庸之先
當仕閩中

素馨華畔十八娘炎雲瑞露酌天漿一日供厨三百顆
使君館券莫支羊

薰陸胡椒膾炙齊明珠象齒駭雞犀世間莫作珍奇看
解使英雄價盡低

東海澄清南海涼公厨海錯照壺觴郎君養好江瑤脆

水母綿明烏賊香

明年歸路蹋陽和雕胯輕衫剪越羅春風通憲河頭路
還與官家得寶歌


顧琛

字淵白嘉興人恃才傲物嘗入京獻燕都賦翰林
元復初斥之曰今天下一家燕乃戰國之名何足
稱也慚恨而歸晚
年官岳陽教授

題錢舜舉畫漁翁牽罾圖

苕溪道人溪上居一生只慣觀打魚吳兒打魚當耕織

意匠別出絲綸餘緯葭縛竹直水口承以密罟防其遁
卒然一掣勢莫禦紫鱗躍出金芙蓉蓬窗草屋色色具
茶瓶酒碗尋常俱船頭青山立突兀船後綠樹搖扶疎
人間名利不可污煙水為席天為廬西塞山前晚風急
醉踏船舷浪花入漁翁心事道人知日暮來看倚筇立
回頭却捉秋兔毫寫入生綃半猶溼令人展卷心茫然
辛苦微官悔何及吳松江上鱸魚肥秋風落葉滿魚磯
何不買舟逕東歸何不買舟逕東歸



宋元詩會卷七十五

欽定四庫全書

集部
宋元詩會卷七十六

詳校官中書_臣陸 湘

主事銜_臣徐以坤覆勘

總校官知縣_臣繆 琪

校對官中書_臣王鍾泰

謄錄舉人_臣龐兆懋

欽定四庫全書

宋元詩會卷七十六

兵部主事陳焯編

楊載

字仲弘建之浦城人後寓杭因占籍焉載少孤博涉羣書為文有跌蕩氣年四十不仕戶部賈國英數薦於朝以布衣召入翰林授國史院編修調管領海船萬戶府照磨延祐初仁宗設科取士載首應詔遂登進士第授饒州路同知浮梁州事遷寧國路總管府推官以卒載所撰述人多傳誦之其於詩尤有法嘗語學者曰詩當取材漢魏而音節則以唐為宗故同時作者得其指授為多焉

偶題

叢生園中草蔚蔚媚幽姿乘時各敷榮皓色被綠枝似
有微香發秋風輒吹之入人襟袖中亦復可憐茲詰朝
步荒畦莖葉稍離披飄零即已矣霜露不爾私榮悴既
有時小大何異而幸愛七尺軀天道不可誣

題文丞相書梅堂

大厦就傾覆難以一木支惟公抱忠義挺然出天姿死
既得所處自顧乃不疑惻愴大江南名與日月垂我行

見遺墨再拜墮涕洟名堂有深意亦惟歲寒枝可知平
昔心慷慨非一時峨峨著檐宇昭昭示民彝勿使風雨
敗永慰千古思

次韻袁伯長

盤盤海底石並樹青琅玕至陽生至陰龍宮常苦寒揚
光炫朝彩吐氣蒸微瀾根株歷千載莫測榮悴端端如
巢居子草木皮衣冠超然去人羣取友蹄與翰日誦黃
帝言浩歌淚闌干奈何天下治必以雲為官佩紱黃金

環咀丹白玉盤自聞至人德積熟生肺肝黃塵日暮起
對面不相看三山在何處使我師王韓聊歌紫芝曲倚
君清夜彈

靈龜篇為陳渭叟作馬尊師所畫芝龜也

蒼龜生中山深阻絕中道不飲亦不食靈和中自抱歲
久凝神液巖上產芝草支干集五采相射顏色好彼遊
江海作計苦不早一罹豫且網性命莫能保歸遺宋
元君天意資探討築宮修祠祭相承以為寶神者固如

斯遺骨易枯槁吾聞蒙莊氏苦語欲相曉持為衛生經
千載長不老

次韻景遠學士立春日 三首

古來有道士聲利不寘懷顧於草木微而愛松若梅茲
辰闕庭戶適逢數花開芳意未渠央是足銜吾杯

人事重名實趨嚮盡百端丈夫負雄氣動欲追古賢於
意少不慊自放江海邊登高望八極雲氣生我前萬事
何足問所須唯酒錢

崎嶇既山曲迢遞亦水濱幸見蓬葦士輒復忘為勤得
之眉睫間我遇固以神所善但樓護豈暇從若人

贈執中允上人

南方多白雲澶漫塞崖谷中有龐眉叟寂寞臥林屋前
門樹高松後戶植幽竹梵文五千卷誦說盡精熟時時
發清唱鏗鏘擊金玉伊余走海內一見輒歎服願言從
之遊淡泊心自足

古牆行

建炎白馬南渡時循王以身任安危疏圃治第壯輿衛
縮板載榦由偏裨下鉅江城但沙鹵往夷赤山取焦土
帳前親兵力如虎一日連雲興百堵引錐試之鐵石堅
長城在此勢屹然上功幕府分金錢謹聲如雷動地傳
爾來瞬息踰百年高崖為谷驚推遷華堂寂寞散文礎
喬木慘淡栖寒煙我入荒園訪遺古所見唯存丈尋許
廢壞終嗟麋鹿遊飄零不記商羊舞王孫欲言淚如雨
為言王孫毋自苦子孫再世隳門戶英公尚及觀房杜

如君百不一二數人生富貴當自取況有長才文甚武
公侯之後必復初好把家聲繼其祖

李伯時畫浴馬圖

古稱難畫莫如馬近朝唯數李伯時不至天閑觀帝服
如此骨相何由知頭類渴鳥尖插耳竟度流沙輕萬里
圉人牽浴恒凜然復恐化龍奔入水貧居里巷無馬騎
徒步出入多傷悲大脰薄蹄何足願退立道旁塵滿面

題華岳江城圖

華岳能詩世有名學畫丹青亦豪放此圖以寫安慶城
雉堞樓臺儼相向北風將至江面黑千艘萬艘爭避匿
滄溟涌溢水倒流南嶽動搖天柱側蛟龍戲落秋潭底
素練平鋪八千里時清好作釣魚翁閒弄輕舟煙霧裏
神馬歌次韻陳元之

神馬來自崑崙西有足未始行沙泥朝趨欲出飛鳥上
夕逝直與奔星齊綠鬃半散插雙耳赤汗交流攢四蹄
風神秀猛隄天地豈顧燕蔡并渠黎時時牽浴臨清溪

對人誇殺黃鬚奚玉沙之禾中芻秣不啗堤頭枯草稊
與君側耳聽長嘶凡馬不聞生馱馱

古劍歌為吳真人作

閒閒真人藏古劍敬之如神不敢忽賓客如來求一觀
輒有悲風起倉卒人言此是金鐵精良工鍛煉久始成
動搖天地合變化摩蕩日月含光精昔年有蛟起江中
口吐烈焰燒長空下民昏溺上帝怒雷電往擊皆無功
嘗持此劍斬蛟首流血滔滔浸廬阜傳記傳聞時既久

不意世間今尚有吾過下里多惡氛魍魎魑魅能食人
請君為我絕此怪一洗宇宙長清新

次韻虞彥高遊陽明洞

憶昔神禹奠九州茲山會計功始休諸侯玉帛渺何許
但見萬水從東流衣冠永閉陽明洞夜聞鬼哭巖之幽
珠宮貝闕號龍瑞天造地設非人謀槎牙怪樹凍不死
化作千丈蒼玉虬丹洞呀然僊掌裂翠峰巧矣蛾眉脩
梅梁飛去鐵鎖斷往往雷雨生靈湫軒轅維神極秘幻

海上笙鶴時相投平生閉門讀史記子乃探穴先吾遊
明當挾子騎汗漫題詩更在最上頭不妨山水樂吾樂
豈有饑溺憂民憂故家喬木尚可求有子有孫百世留
臥橫玉簫汎歸舟吹散萬斛江南愁

梅梁歌酬鄭集之

大禹之功及天地廟有梅梁何足異奈何過用鐵索纏
太祝為之欲徼利每言變化失其所去作老龍治風雨
一聲霹靂震巖扉千尺蜿蜒辭殿戶七月槁苗沾塊土

憂殺村中老農戶買羊沽酒祭梅梁祭罷祠官傳好語
吁嗟老農無爾愚大禹有神焉可誣汝曹淫祀欲求福
此物為妖當伏誅

題秋雨長吟圖

雨暗秋天黑如墨窮居茅屋出不得終日長吟復短吟
吟罷令人轉淒惻饑猿抱樹屈雙肘病鶴抱泥垂兩翼
何當策杖過溪頭要看南山新翠色

題信州先天觀圖

高林褰翠氣虛谷散虹光道士多騎虎僊人自牧羊澗
泉通地遠山嶺際天長戴子文為記流傳示不忘

寄劉師魯

想君遊宦處正值洞庭湖落日波濤壯晴天島嶼孤舟
航通漢沔風物覽衡巫天下文章弊非君孰起予

蠹簡

往古韋編在何年始汗青蠹蟲深卜宅蚪蚪少成形泯
滅貼秦火按羅出漢廷斯文天未喪不敢望全經

斷碑

摩挲不成讀上有鮮苔斑字畫鍾王輩文章漢魏間龜
跌凋顛顛螭首落孱顏渤海神明遠今同磴石頑

初陽臺望月

彩雲相累歷華露笑嬋娟在水渾疑墮當空孰使縣潛
虬精魄動宿鶴羽毛鮮寂寂丹臺夜相從訝得僊

送屠存博

君往金陵郡於予亦有聞海環平野盡山出大江分未

召元司馬誰憐鄭廣文自今師道立章薦必紛紛

渡江寄俞仲連

舟楫大江濱中流日欲曛
鹵翻沙際雪潮落渡頭雲
鯨躍常知候鴻飛不亂羣
頗思論勝槩把酒莫如君

奉題伯父雙峰樵隱二首

山出雙峰秀溪流一派清
土風存禮讓人事省將迎
路逐高低過田隨早晚耕
家林有如此南望每關情

石樹盤根瘦沙溪激浪清
竹間看犢臥木末見人行
穡

事常分力樵歌輒和聲往來攜杖處不礙白雲生

贈胡汲仲

先生惟達道久已樂山林致聘無雙璧為家過千金
閒雲出岫髮短雪盈簪遯世原吾志同盟欲自今

題拱北樓

殷地鼓鞞迎日出倚天梁棟與雲浮北瞻帝闕三千里
南控臣藩二百州江海無波沈罔象旌旗垂野聽貔貅
鸞回麗榜多深意繡袞于今有魏牟

題本齋王公畫像

詩禮傳家公望隆一門三世拜三公
五營帶甲軍容盛九府流泉國賦充
房魏素懷尊主術龔黃先奏養民功
欲將惠澤量深淺楚浸洋洋與海通

錢塘懷古四首

山回禁籞入雲長無復陳兵衛兩廂
千古金鍾埋野草萬年珠樹落秋霜
龍文不徙陽人聚鳥篆終降枳道旁
九市塵埃來衮衮一江波浪正茫茫

西湖清濁自天開鴻雁鳬鷗日往來黃道星辰環太乙
紫雲宮殿擁蓬萊論文競奏王褒頌獻壽深傾阿母杯
九域輿圖今混一百年耆舊獨興哀

斜界鉤陳通大道中分魏闕對層巒雲生殿上金爐暗
露下庭前玉井寒江漢飛龍俄杳杳滄溟泛鷁竟漫漫
中天會合寧非數坐見蒼生枕簟安

化人宮闕被層阿殿宇高低若湧波翠石文章題日月
寶珠光燄燭山河空桑說法黃龍聽貝葉翻經白馬馱

誰謂一無超衆有只今塵土重來過

送袁伯長扈駕

罕畢前驅盛國容黃麾僊仗衛重重星流曠野飛蒼鶻
日麗層霄馭赤龍耀武邊陲須北狩合祛天地待東封
論才孰可銘休烈扈蹕還宜祀岱宗

送羅雲叔歸山

黃石山原風物幽賤子往年曾一遊舊行屨拓已成徑
新藝麻禾應滿疇馮衍能忘白首歎謝安須為蒼生憂

餘杭溪上明日發愁殺楊花吹客舟

壽饒國公

可樂無如父母全既賢既貴又長年金壺賜出青雲上
玉佩朝辭白日邊楚木論春猶五百蟠桃稱壽必三千
侶聞黃綺歸來後長向山中作隱僊

贈同院諸公

詔編國史有程期正是諸郎倬直時虎士守門宮杳杳
雞人傳箭漏遲遲憲間夜雨銷銀燭城上春雲壓彩旗

才大名稱天下選書成當繼古人為

送吳真人

具嚴威命領祠官歷祀名山不厭難上帝乘龍遊下土
真人騎鶴降靈壇已刊白玉為封檢更鑄黃金作祭冠
國壽延洪千萬歲願祈穀熟小民安

寄吏部尚書張公

復喜清朝用大賢玉音俄對廣庭宣姚崇已託君臣契
李泌終持將相權此日經綸須展布他時簡策要流傳

淵明有待公田米可念江湖久棄捐

歐陽玄

字原功其先家廬陵與宋文忠公同所自出曾祖
新始遷居瀏陽故玄為瀏陽人幼岐嶷母李氏親
授孝經論語小學諸書甫八歲能成誦十歲從張
貫之學即知屬文稍長試庠序輒占高等延祐二
年登進士第授岳州路平江同知調太平路蕪湖
縣尹改武岡縣尹皆著能聲名為國子博士遷監
丞拜翰林待制兼國史院編修官凡制詔書檄皆
出其手及奎章閣啟又置藝文監隸焉文宗親署
玄為藝文少監改僉太常禮儀院事歷翰林直學
士國子祭酒翰林學士總裁遼金宋三史書成超
授承旨進階光祿大夫以病卒於官年八十
五追封楚國公謚曰文有圭齋集若干卷

送振先宗丈歸祖庭

歐公孫子多擘派以爲四暮年歸潁陰非無首丘志乞
洪不得請由是懈歸計攷公生平言亦頗憾先世先世
多才賢生適逢五季幅員政分裂盡瘁于所事竟乏垂
世名蓋亦限地勢況復公少孤坎壈蜀漢裔身當混一
秋代逢承平際擇里審所安實邇輦轂地子孫託畿內
宦轍亦云易人情苟免爾公豈溺聲利詎知汴虞移南
北尋睽異一枝先南邁司造有深意沙溪標德里瀧岡

重塋祭至今青原冢十世紀不替振先吾宗英守正恥
骹骹閭閻保家法處約不少懟嘉樹無粵枝嘉穀無穗
滯原本既不凡時需諒無棄矧今掄俊髦往往論根器
老夫辭冊府多病久憔悴徒懷薦士心言莫足軒輊賦
詩當推轂自愧辭已費憧憧青雲友誰如古人誼

為所性姪題小景

林廬淡疎煙歸帆泊沙渚披圖得空濶總是經行處寒
屋茆簷古疎烟野樹春遙遙濟川者應是此中人

和李溉之舞姬脫鞋吟

宮袍繡蹙金花綺紅綃緊襯雙鸞尾
盈盈漫服舞腰輕
綵雲飛處香風起藕絲掣斷春雲鬆
瑞蓮雙結並頭紅
天天曲曲玉彎卷翠鳬翔空迷近遠
玉階秀茁蘭筍長
瓊砂迸出蘆芽淺徘徊困倚東風力
溼砌香雲墜無跡
無限嬌羞不自持君王喚起扶花立

題紫微老人大字歌

紫微老人射生手挽強竟取黃金斗
驃騎營中拜驍勇

鳳凰池上稱耆舊時平腕力無所施筋骨猶能學顏柳
縱橫戎略結構體殺活兵機屈伸肘山莊劉氏得最多
當日襜褕駐應久高樓大扁曰明遠況有愛山并尚友
我來後公五十年主人酌我樓中酒平田野水鳬雁集
重岡複嶺蛟龍走登高欲賦乏佳興忽覩台躔照牕牖
家藏有此希世珍取酒當為主人壽想當洗研弢筆時
羽箬生風劍龍吼馬知今人正傳玩名與麒麟同不朽

道吳山

道吳山頭龍自臥疊嶂重岡深紫邏靈湫瀑布千尺長
古寺神杉十圍大崇祠坎坎風雨來樵徑丁丁鴻雁過
郡人夜望北斗魁下有突兀青蓮座

大圍山

大圍山高高幾許絕頂嵯峨戴林塢石隙花開自夏春
地爐僧擁無寒暑清流白鷗滌羽毛綠樹黃熊引筋膂
山腰日午嬰兒啼知有雷公出行雨

大明殿早朝

扶搖萬里上青霄鳳閣龍池覲帝迢駝背負琛金絡索
象身備駕玉逍遙衣冠俯伏傳呼嶽千羽低回看舞韶
湖海布衣傳盛事他時田野夢天朝

相臺

負郭東南裴相臺緣溪一徑踏蒼苔此日城闌少人到
當時公府棄官來禪牀象屋留光雨書沼蛙聲噤鞠灰
坐待氛塵斂淨舉頭應解識三台

至正壬午十一月十三日祭初祖墓

白髮甘泉忝從官歸來曳履上吟壇故山虎豹多文采
白水蛟螭有屈蟠謁客及門容屨滿贄文盈篋借燈看
百年省墓償初志心憶先親已痛難

送李宜忠之寧州教授

廣文家住白芒原唐世忠臣閥閱存寧郡喜迎新博士
邦人特重舊王孫楊花絳帳春雲陣苔蘚丹書暮雨痕
向使汾陽晞曖在應慚詩禮在名門

竹澗圖

青林翠巘俯江郊，谷口湍流巨石坳。
戛玉萬竿鳴水樂，垂紳雙瀑盪雲旂。
風漪靜浸蒼龍影，月瀨光搖紫鳳巢。
歌罷商巖採芝曲，兩翁翰墨定神交。

接花木

園丁妙手即花神，換葉移枝偽脫真。
刀剪豈能傷化力，色香無復記前身。
春深自有鸞膠續，歲久行看鶴膝伸。
堪笑微生亦如此，任呼牛馬定誰人。

寄有壬許參政

京華白髮染塵埃喜見文場閉復開自是曹參當繼相
不然王式肯輕來上躬藻火慚無補衆論鹽梅屬有材
素志已酬歸欲早相期濁酒坐莓苔

西明道人

武昌堤上水雲身三十年來識道人只為漫遊相見少
故知臨別贈言頻憧憧車馬紅塵老靡靡江山白髮新
邂逅一回頻唱和錦囊千首未為貧

昌山

昌山峽口日西斜
蘭渚維舟近酒家
水漱樹根龍露爪
石排江岼虎交牙
路迴佛寺藏深塢
風動漁舟掃落花
再拜靈均獻蘋藻
月明環珮下汀沙

早飲聽秋居士園池

碧池流水綠潺潺
高下樓臺紫翠間
阮籍才華勝南族
謝安清致滿東山
標名花塢鶯爭道
集句桃符鹿守關
灑掃園丁今白髮
秋翁化鶴幾時還

題所貴姪梅

老樹縱橫出幾條一枝還又亞牆腰西湖湖上掀篷看
一夜吹香滿六橋

陳搏睡圖

陳橋一夜柘袍黃天下都無鼾睡方贏得墜驢閒老子
為君眠斷白雲鄉

閒展山水手卷

十年京國看圖畫半幅雲煙亦惱儂今日身行屏障裏
却思移住最高峰

東山春景

春光澹澹日遲遲正是名園撲蝶時却憶小橋流水過
東山春色在桃枝

范梈

字亨甫一字德機清江人家貧早孤母熊氏守志不
他適長而教之梈聰慧所誦讀輒記憶癯然清寒若
不勝衣於流俗中克自樹立固窮守節竭力以養
親耽詩工文用力精深人罕知者年三十六始客
京師有聲諸公間用朝臣薦授翰林院編修官秩
滿擢海南海北道廉訪司照磨遷江西湖東選充
翰林供奉改福建閩海道知事閩俗素汚文繡局
取良家子為繡工無別尤甚梈作歌詩一篇述其

樊廉訪使取以上聞皆罷遣之未幾移疾歸天厯
二年詔起用以養親辭是歲嬰母喪甫暮槨亦得
疾卒年五十九所
著詩文多行於世

節婦王氏

妾年時二三始識月團圓十二學女工刺繡如鴛鴦十
九嫁夫家事姑施衿鞶夫壻良家兒世籍為王官雖聯
朱紫貴不習綺與紈過庭執詩禮開口若驚湍風儀在
一時爭作玉人看天地忽降毒摧折青瓊玕回首四十
春景光若流丸貞心守松柏芳性軼芝蘭落月簾帷曙

西風機杼寒沈思往昔事淚下紅闌干豪客至茅屋舉
家竄林巒入房衛病姑身死白刃攢相向義憐釋視死
色無難親知為歎息保社為辛酸欲與上州府為妾旌門
闌妾實無所願唯願在所安婦人往從人阿母涕洟瀾
送行遺之語敬順無違歡匹偶固有時寧知憂患端辛
苦蹈物變豈羨身獨完殷勤謝舊故聞者摧肺肝

贈別張清夫還吳

新雨不作泥鉤輻樹上啼征夫懷遠路家在太湖西別

家今幾度楊柳江邊樹念鄉車輪下漸是中年路萬事
中年尚可期人生且莫長別離長別離向何方九河落
花青蒲香王睢斑斑鳬乳黃南望不見三高堂奈此遊
子思故鄉我家朱公濟時早功成身退合天道當時未
必知者賢挽之不回臥煙島後來閱盡虧成事始識從
初去時好我不能赤手縛虹蜺又豈能委身同草木生
逢有道世肯受泥塗辱昨者誤奮龍門雷螻蛄嘲之自
云足憂來舉觴酬白日唯有皇天照空谷張公子吳江

生我有千載意不羨身後名為君寫作送行曲曲中鏗
憂難為情明日買船櫂秋聲亦欲東下窺滄瀛飄然始
去白玉京須君禹穴相逢迎相迎不見須相待客行雖
遲心不改

王氏能遠樓

遊莫羨天池鵬歸莫問遼東鶴人生萬事須自為跬步
江山即寥廓請君得酒勿少留為我痛酌能遠之高樓
醉捧句吳匣中劒斫斷千秋萬古愁滄溟朝旭射燕甸

桑枝正搭虛窓面崑崙池上碧桃花舞盡東風千萬片
千萬片落誰家願傾海水溢流霞寄謝尊前望鄉客底
須惆悵惜天涯

轆轤怨

門前水揚聲似雨幽人當牕碧絃語東里征夫去不歸
一雙蛾眉鏡中舞年年井上攀轆轤勞心只恐秋葵枯
他年種得長生草梅花落盡青青好

雲林歌為貢供奉作

朝望宣城夕企雲林掃花釣月清我閒心城東之山倚
天碧手捫南斗近咫尺幽人築堂面山坐絕似謝公故
時宅謝公今何在蒼苔剪行跡調笙誦新詩流水照白
石看水作明鏡年光靜來往夜深敬亭雨坐見南湖長
清風被長陂鳥度菱葭響雲之林兮不可攀中有青猊
白鶴相盤桓林之雲兮不可縛時來宿我青檐端昂藏
老僊人抱琴臥山側憶在中華時相逢鬢未白問之不
笑亦不言阿家中子瀛洲客却起遺我寶字書依稀攝

精縛魂魄相期後天無極年笑爾守之合自然御氣還
得同飛僊未登雲林堂試作雲林歌嗟我久客意衰邁
雲林雲林奈爾何

掘塚歌

昨日舊塚掘今朝新塚成塚前兩翁仲送舊還迎新舊
魂未出新魂入舊魂還對新魂泣舊魂丁寧語新魂好
地不用多子孫子孫綿綿如不絕曾孫不掘玄孫掘我
今掘矣良可悲不知君掘又何時

贈別徐教授之欽州

冉冉歲月莫悠悠，關塞長歌鐘凝旅宴舞。袖拂征艎到日梅，花亂來春蕙草芳。南金自昔重寄贈，可能忘

和李溉之園居禱咏三首

書劍上青霄，鄉關雨雪遙。年華侵水竹，客思墮山苗。會想商岳綺，將從鄭里僑。文詞誠小技，祇比俗情饒。

豈是幽棲地，飛騰亦未量。城根分鼠壤，池面合魚梁。名久喧郎署，歌時感女桑。畏卿音調苦，疇復貴相忘。

圃色依簾障天光切戶庭草生連夜雨花落遍池星未
遂翔寥廓真堪託晦冥逢時須紫燕得意拂青萍

辛酉歲元日

西山千仞鬱崔嵬山下樓臺紫翠開玉帛會同來萬國
璣衡縣運屬三台嘗聞海客談金鼎更見祠官進玉杯
慚愧詞臣今白首久無賦頌獻蓬萊

四月十六日東華門奉迎香輿

天香曉報出宮城已辨螭頭合樂迎黃鳥低斜衝隊過

紫駟踈蕩著班行百王盛祀無遺典萬乘深居有至情
最喜快傳湯沐賜禮官識姓未知名

送白無咎太守之郡

瀟灑中書舊省郎排雲曾攬舜衣裳一麾況復守名郡
萬事不如歸故鄉馬首漸違燕闕雨雁聲欲度晉城霜
漢廷擇相皆良吏蚤奉潘輿謁建章

寄上甘肅吳右丞二首

要使明時化遠覃玉門闕下屈征驂多憂總為民心苦

有喜唯聞郡姓甘日晚邊沙黃逸逸天晴隴樹碧穆穆
國風不繫秦州外自此西人識名南

塞上孤鷹白雪毛塞門風物靜蕭騷黃河西去從天下
泰華東來拔地高枸杞莫將如意苴醍醐足飲勝蒲萄
遙瞻圭袞還舟日正屬江湖心緒勞

寄題集賢周司直

番陽東下萬山圍魁閣崢嶸面翠微雲接大荒迴古色
波涵落木動晴暉宦情靜與遊魚逝詩思長隨夕鳥飛

久待倚闌成獨酌癡兒了事各須歸

張留公母

山風遙引紫雲車樓閣春深阿母家更五十周重甲子
後三千歲一桃花綵衣故綰封留印白壁新隨使蜀槎
見說麻姑舊行處至今源上有丹砂

開歲

自違北極向南辰重見東皇似故人合席管絃方殿歲
殊鄉花柳覺先春水歸楚澤魚俱化天覆周郊獸亦仁

薄宦於時無補報且須康濟百年身

草堂

草堂不在萬山峰時有幽人步往蹤
雨壓牆煙籠薜荔石行渠水鑑芙蓉
清名豈讓陶貞白共住猶強陸士龍
勿憶雁行天外去歸來期向粵城中

送毛鍊師奉祠禮成還京

僊官持節下青冥海瀆嚴祠衛百靈
行為治平循禹服禮從裡祀想虞廷
東風到處隨神雨南極歸來奏壽星

致福要當宣室問鶴書先報白雲扃

送別周儀之官錢塘并柬李四秘書

武帝龍飛第一春京華相送各沾巾詎知邂逅文身地
同是栖遲皓首人山驛蛟眠星滿洞水鄉雁起月迷津
若逢李謫南天竺為說前書感謝頻

將赴雷陽送羅提舉之任廣東

松滋暫泊薊門船復指番禺路幾干茉莉香深和酒露
枕榔葉暗煮鹽煙齊人舊算無遺策漢史新藏有剩錢

莫為遐荒心力怠朱崖更在海南邊

以瓊扇一握奉致黃明府

拾得炎州月一團殷勤持贈比琅玕情知已是秋風後
留作明年九夏寒

鍾陵夜宿聞鐘

中年江海夢虛皇夜半聞鐘似上陽一百八聲猶未已
更兼雲外雁啼霜

渡端州峽

濯郎得便泝清流忽報舟前曉霧收蠻語酬人翻自苦
好山不敢問何州

聞東鄰夜歌

促拍繁歌沸不停月高絃語轉明星莫令知有西鄰客
獨坐挑燈看六經

薛漢

字宗海詩
名象峰集

擬古二首

皎皎機上絲織為遊子衣遊子蕩風塵素衣化成緇風
塵不可避四顧將何之豈不念潔白徒重墨子悲勗哉
加澣濯河水清且漪

娉婷閨中女天質知自愛空懷蘋藻心日月苦行邁蹇
修意良勤遲遲如有待未嫁庸何傷失身墜東海

送牟伯厚還雪

西風起雙鴻渺渺度萬山空林霜霰落各念飲啄難中
途忽相失獨留諒無歡極目送冥飛風雲逸脩翰低回

守羅網自顧形影單奮翅念遠舉天路浩漫漫空想五
湖水東風漲波瀾

寄余希聲

寄語中林友相思又幾朝書雖為路阻夢不怕山遙風
定落花慢雨深青草驕人情諒難必不似往來潮

枉渚

枉渚倚孤櫂意行隨杖藜鷗邊漁艇小牛後牧童低秋
色多因樹寒聲半是溪何當買茅屋此地卜幽棲

湖上

一舸泛霜晴湖波寒更清
平堤連野色遠市合春聲
塵土浪終日山林負半生
回頭夕陽外煙渚白鷗輕

搖落

搖落歲華晚蕭條門巷空
黃花數點雨紅葉五更風
挽鏡徒催老耽書漫得窮
親朋頓乖隔幽意若為同

送柳湯佐

太行盤踞勢嚴嚴五馬初行衆具瞻
他日去思應借寇

此時來暮正歌廉七賢舊竹風流在萬善新茶歲貢兼
莫謂名邦天稍遠飛龍曾向此中潛

送趙虛一降香至南海廬山會稽

天香分下殿西頭處士今乘使者騶曾是騎麟驂北斗真
成跨鶴過揚州山中五老應相識海上三神亦易求
越東南僊柱觀神光依舊貫林丘

睡起

卷簾春色上苔衣新水相看近竹扉風動樹枝鳴宿鳥

雲收山嶠放晴暉，舉杯竹葉歸愁去。
欹枕楊花約夢飛，腸斷碧苔溪上路。
暖風斜日釣魚磯。

和馬中丞無題詩三首

乘槎準擬逐秋潮，却訪成都萬里橋。
滄海有山皆縹緲，青雲無路不迢遙。
閒居潘岳驚斑鬢，歸去陶潛懶折腰。
後夜相期明月上，露臺高處弄笙簫。

驥服鹽車兩耳垂，臂無九折未成醫。
欲尋箕穎終逃世，苦恨章逢不入時。
金井蛩鳴知露冷，銀橋鵲度見星移。

長貧久客應無補擬挹滄浪塞漏卮

良人執戟侍明光誰與金爐共夕香妝鏡曉寒凝蝶粉
舞衣春暖卸鶯簧渡江桃葉應憐我照水荷花宛見郎
太息蹇脩無復理空思攜手又縫裳

陸景龍

字德陽詩
名湖峰集

楫拙窩

安樂窩中興澹然靈根所得自樵僊地爐伏火春如海

雪屋圍風夜似年香透玉酥和芋撥脂流琥珀帶松然
任他沈水燒金鴨吹徹參差惱醉眠

紙帳

溪藤搗雪淨無瑕素箔圍風絕可誇夢入清虛明月照
倦遊廣漠白雲遮繭窩春暖浮銀色鮫室宵分散玉華
驚鶴一聲天已豁老夫詩思繞梅花

宋元詩會卷七十六